



**JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU**

**Sumáriu Kazu 2014
Tribunál Distritál Suai
Marsu 2014**

**Sumáriu prosesu julgamentu kazu iha Tribunál Distritál Suai -
períodu Marsu 2014**

Intródusaun

Iha fulan Marsu 2014, JSMP kontinua monitoriza kazu iha Tribunál Distritál Suai (TDS). Iha períodu ne'e JSMP konsege monitoriza kazu hamutuk 24, ne'ebé kompostu husi kazu krime 23 no kazu sivíl 1 husi total kazu 25 ne'ebé Tribunál Distritál Suai julga iha fulan Marsu nia laran.

Kazu krime 23 mak hanesan abuzu seksuál ba menór 4, denúnsia kolunioza 1, omisídiu agravadu 1, abuzo konfiansa 2, danu agravadu 1, infantisídiu 1, ofensa ba integridade fízika simples 2, ofensa ba integridade fízika simples ho natureza violénsia doméstika 3, ofensa ba integridade fízika grave 1, maus tratus ba kónjuje 1, maus tratus ba kónjuje no interupsaun ba gravidés 1, furtu agravadu 1, burla agravadu 1, ofensa ba integridade fízika simples no danu simples 1, violasaun seksuál agravadu 1 no danu simples 1. Enkuantu ba kazu sivíl mak inventariu ba menóres 1.

Hosi total kazu 24 refere, kazu 13 tribunál remata ninia prosesu no restu kazu 11 mak sei kontinua prosesu. Kazu sira ne'e, aleinde, julga iha Tribunál Distritál Suai, kazu balun, julga atraves hosi tribunál movel iha Distritu Bobonaro no Same-Manufahi.

Tuir mai deskrisaun sumariu julgamentu kazu kompletu :

1. Kazu krime abuzu seksuál ba menór - Nú. Prosesu: 243/pen/2013/TDS

Kompozisaun Tribunál	: Koletivu
Juis	: Dr. Pedro R. de Figueiredo (reprezenta juis koletivu)
Ministériu Públiku	: Dra. Benvinda da Costa Rosario
Defeza	: Dr. João H. de Carvalho
Konkluzau	: Kondena ho pena prizaun tinan 15

Iha 14 Marsu 2014, Tribunál Distritál Suai prezide leitura akordaun ba kazu abuzu seksuál ba menór ne'ebé involve arguidu JV ba tinan 15 prizaun. Arguidu provadu komete krime abuzu seksuál ba menór hasoru lezada FDA, iha 31 Agostu 2013, iha Distritu Suai-Covalima.

Ministériu Públiku akuza katak iha 31 Agostu 2013 maizumenus oras 16:00 lorokraik arguidu bolu lezada ne'ebé sei ho idade tinan 12 ba iha uma laran no loke filme *porno* iha telemóvel hodi hatudu ba lezada hare. Depois arguidu kolu lezada nia roupa no halo relasaun seksuál ho lezada.

Relasiona ho aktu ne'e, Ministériu Públiku akuza kontra artigu 177 kona-ba abuzu seksuál ba menór ho moldura penál tinan 5 to'o tinan 20 no artigu 182 (a) kona-ba agravasaun ba labarik ne'ebé idade ki'ik liu tinan 12.

Iha julgamentu laran, arguidu konfesa totalmente faktus hirak ne'ebé Ministériu Públiku akuza ba nia. Aleinde ne'e, faktu hirak ne'e mós kontinua refórta husi depoimentu testemuña NL ho ADA ne'ebé haktuir katak sira hare ho matan arguidu halo duni relasaun seksuál hasoru lezada.

Antes ne'e, Ministériu Públiku husu ba tribunál hodi kondena arguidu ho pena prizaun tinan 14 ba leten. Defeza husu ba tribunál atu kondena ho pena ne'ebé justu tanba arguidu konfesa totalmente ba faktus no arrepende ba nia hahalok. Depois avalia faktu sira ne'e hotu, tribunál konklui hodi kondena arguidu ho pena prizaun tinan 15. Kondenasaun ne'e ass liu tinan ida hosi alegasaun Ministério Públiku.

2. Kazu krime denúnsia kalunioza - Nú. Prosesu: 22/pen/2014/TDS

Kompozisaun Tribunál	: Singulár
Juis	: Dr. Costâncio Barros Basmerly
Ministériu Públiku	: Dr. Antonio da Silva Tavares
Defeza	: Dr. Manuel Amaral (estájiariu)
Konkluzau	: Absolve

Iha 20 Marsu 2014, Tribunál Distritál Suai julga kazu denúnsia kalunioza ne'ebé involve arguida Monika de Jesus hasoru lezadu Moises do Carmo Marçal no Sergio Agostu de Araujo nu'udar membru PNTL, iha 14 Dezembru 2012, iha Distritu Suai.

Ministériu Públiku akuza katak iha 14 Dezembru 2012, arguida hatama keixa tanba la konkorda ho akuzasaun Ministériu Públiku iha kazu antes ne'ebé involve arguida hanesan lezada ba kazu ofensa ba integridade fizika grave.

Ministériu Públiku akuza arguida kontra artigu 285 Kódigu Penál, kona-ba denuncia kalunioza ne'ebé ho nia moldura penál too tinan 3 ka multa.

Iha kazu ne'e, lezadu sira hatama keixa hasoru arguida tanba arguida haruka karta fórmal ba Komando Jerál ne'ebé alega katak Moises do Carmo Marçal no Sergio Agostu de Araujo nu'udar membru PNTL, simu osan hosi ema na'in 12 ne'ebé antes ne'e komete krime ofensa ba integridade fizika grave ba arguida. Tanba ho karta ne'e Moises no Sergio hetan xamada atensaun husi Komando Jerál.

Iha prosesu ne'e, arguida deklarata katak nia lahatene lee no hakerek tanba ne'e nia la hakerek karta maibe nia husu ajuda AdJ ne'ebé servisu iha ONG ida mak hakerek karta ba Komando Jerál.

Testemuña AdJ husi ONG refere depoimenta katak nia hakerek duni karta ba Komando Jerál tuir buat ne'ebé arguida Monika hateten. Maibe AdJ deklarata katak nia la hakerek kona-ba faktu sira ne'ebé akuza lezadu na'in rua simu osan hosi arguidu na'in 12, tanba laiha nia asinatura.

Iha alegasaun finál, Ministériu P'úbliku husu ba tribunál atu kondena arguida ho pena prizaun tinan 2 suspende ba tinan 2. Defeza husu tribunál atu absolve arguida hosi prosesu ne'e tanba arguida la komete krime ida ne'e.

Depois avalia faktu sira ne'ebé relasiona ho kazu ne'e, ikus-mai, tribunál konklui kazu ne'e no absolve arguida hosi prosesu tomak.

3. Kazu krime abuzu seksuál ba menór - Nú. Prosesu: 05/pen/2013/TDS

Kompozisaun Tribunál	: Koletivu
Juis	: Dr. Pedro R. de Figueiredo (representante juiz koletivu)
Ministériu Públiku	: Dra. Benvinda da Costa Rosario
Defeza	: Dr. João H. De Carvalho
Konkluzau	: Kondena ho pena prizaun tinan 3 suspende ba tinan 5

Iha 18 Marsu 2014, Tribunál Distritál Suai liuhosi julgamentu movel iha Distritu Bobonaro, prezide leitura akordaun ba kazu abuzu seksuál ba menór ne'ebé involve arguidu MLX hasoru lezada CX ne'ebé sei ho idade tinan 13.

Ministériu Públiku akuza katak iha 31 Jullu 2013, iha Bobonaro, arguidu bolu lezada ba iha uma laran no hatoba lezada iha kama leten, hasai lezada nia roupa no halo relasaun seksuál ho lezada.

Tanba aktu ne'e, Ministériu Públiku akuza arguidu kontra artigu 177 (2) Kódigu Penál kona-ba abuzu seksuál ba menór ho prátika aktu seksuál relevante ne'ebé ho nia pena abstratu hosi tinan 5 too tinan 15 prizaun.

Iha tribunál, arguidu deklarata katak nia la konsege halo relasaun seksuál ho lezada maibe nia lori nia penis kose deit iha lezada nia vagina. Arguidu deklarata katak nia selu ona indemnizasaun US\$ 1000,00 no bibi ida hodi taka lezada nia moe.

Antes ne'e, iha alegasaun finál, Ministériu Públiku husu ba tribunál hodi kondena arguidu ho pena prizaun tinan 4 suspende ba tinan 5. Entretantu parte defeza husu ba tribunál atu fó pena

ne'ebé justu ba arguidu tanba arguidu konfesa totalmente ba faktus no provas ne'ebé nia halo no arguidu mós arrepende nia hahalok.

Bazeia ba faktu sira ne'e, tribunál konklui no kondena arguidu ho pena prizaun tinan 3 suspende ba tinan 5.

4. Kazu krime omísidiu agravadu - Nú. Prosesu: 206 /pen/2013/TDS

Kompozisaun Tribunál	: Koletivu
Juis	: Dr. Pedro R.de Feigueiredo, Dr. Costâncio Basmerly, Dr. Alvaro Freitas.
Ministériu Públiku	: Dr. Felismino G. Cardoso.
Defeza	: Dr. Marçal Mascarenhas
Konkluzau	: Kondena ho pena tinan 24-28 prizaun

Iha 18 Marsu 2014, Tribunál Distritál Suai liuhosi julgamentu movel iha Distritu Bobonaro kondena arguida Augusta Paulina Meakho pena tinan 24 prizaun, arguidu Laurentino Mau ho pena prizaun tinan 25 no arguidu Patricio Romali kondena ho tinan 28 prizaun.

Tribunál deskobre no prova katak arguidu sira prátika krime omísidiu agravadu no tentativa omísidiu hasoru lezadu/a na'in 8 ne'ebé rezulta ema na'in 6 mate kedas iha fatin akontesimentu no na'in rua seluk sofre kanek todan. Kazu ne'e akontese iha 25 Outobru 2012, iha Atabae, Distritu Bobonaro.

Aleinde ne'e, iha mós arguidu na'in rua seluk, Evanjelino Tavares no Vitor Soares da Graca ne'ebé alegadu involve iha kazu ne'e, maibé tribunál absolve tanba tribunál la hetan prova suficiente ba sira nia involvimentu iha krime ne'e.

Iha audiénsia julgamentu arguidu sira konfesa totalmente faktus hotu no hatudu sira nia arependementu ba hahalok ne'ebé sira komete. Arguidu sira mós deklara katak sira dame malu ona ho lezadu/a sira ne'ebé sei moris liuhosi sira nia tradisaun. Deklarasaun ne'e hetan konfirmasaun mós hosi lezadu nain rua ne'e.

Antes ne'e, Ministériu Públiku akuza katak iha 25 Outobru 2012, maizumenus iha tempu kalan, arguidu sira falun oin metin, tama ba iha lezadu sira nia uma laran ho katana taa lezadu na'in 6 mate kedas iha fatin akontesimentu no nain rua seluk hetan kanek todan. Kazu ne'e akontese tanba hadau malu riku soin, entre parte arguidu/kodenadu sira ho lezadu/a ne'ebé ho estatutu nu'udar feen kiik no feen boot.

Ministériu Públiku akuza arguidu sira kontra artigu 139 Kódigu Penál kona-ba omísidiu agravadu kónjuga ho artigu 23 Kódigu Penál kona-ba tentativa.

5. Kazu krime abuza konfiansa - Nú. Prosesu: 238/pen/2013/TDS

Kompozisaun Tribunál	: Koletivu
----------------------	------------

Juis : Dr. Pedro Raposo de Figueiredo, Dr. Argentino
Luisa Nunes, no Dr. Alvaro Maria Freitas
Ministériu Públiku : Dr. Felismino Garcia Cardoso, Dr. Antonio Tavares
Defeza : Dr. Manuel Amaral (estajariu)
Konkluzau : Kondena ho pena prizaun tinan 3 suspende tinan 5

Iha 18 Marsu 2014, Tribunál Distritál Suai, liuhosi julgamentu movel iha Distritu Bobonaro kondena arguidu José Moniz ho pena prizaun tinan 3 suspende ba tinan 5 tanba provadu komete krime abuza konfiansa hasoru ONG Tuba Rai Metin.

Ministériu Públiku akuza katak iha 05 Jullu 2012, arguidu ne'ebé hanesan funsionáriu iha ONG Tuba Rai Metin, utiliza ONG ne'e osan US\$ 3.836,10 ne'ebéba nia interese privadu.

Ministériu Públiku akuza arguidu kontra artigu 256 Kódigu Penál kona-ba abuza konfiansa ho nia moldura penál too tinan 3 ka multa.

Iha tribunál arguidu rekoñese ninia hahalok no promete katak nia atu selu fila fali osan refere iha tinan ida nia laran no NGO Tuba Rai Metin mós konkorda ho arguidu ninia promesa ne'e.

Antes ne'e, iha alegasaun finál, Ministériu Públiku husu ba tribunál atu kondena arguidu ho pena prizaun tinan 4 suspende ba tinan 5 no selu fali osan NGO Tuba Rai Metin nian ne'ebé arguidu uza ona. Entretantu defeza husu ba tribunál atu fó pena suspensaun ne'ebé kmaan ba arguidu tanba arguidu konfesa totalmente ba faktus no provas ne'ebé mak nia halo.

Bazeia prosesu hirak ne'e, tribunál konklui no kondena arguidu ho pena prizaun tinan 3 no suspende ba tinan 5.

6. Kazu krime danu agravadu - Nú. Prosesu: 17/pen/2014/TDS

Kompozisaun Tribunál : Koletivu
Juis : Dr. Pedro R. de Figueirera, Dr. Alvaro Maria Freitas no Dr.
Argentino Luisa Nunes
Ministériu Públiku : Dr. Antonio da Silva Tavares
Defeza : Dr. João Henrique de Carvalho
Konkluzau : Kondena ho pena prizaun fulan 3 suspende ba tinan 1

Iha 20 Marsu 2014, Tribunál Distritál Suai prezide leitura sentensa no kondena arguidu Domingos dos Santos ho pena prizaun fulan 3 suspende ba tinan 1 tanba provadu komete krime danu agravadu iha Eskuadra Polísia, Sub-distritu Fohorem, Distritu Suai, iha 04 Juñu 2013.

Ministériu Públiku akuza katak iha 04 Juñu 2013, maizumenus iha tuku 06:00 lorokraik, arguidu ne'ebé lanu toda estraga no sobu xave odamatan Eskuarda Polísia Sub-distritu Fohorem. Aktu ne'e hamósu prejuizu ho maisumenus US\$ 15,00.

Ministériu akuza arguidu kontra artigu 259 Kódigu Penál, kona-bá danu agravadu ho moldura finálpenál tinan 2 to'o tinan 8 prizaun.

Arguidu deklara katak nia hadia no troka ona xavi ne'ebé nia estraga. Arguidu mós arepende ba ninia hahalok no promete la repete iha futuru.

Testemuña QdC depoimentu katak nia hare ho matan akontesimentu maibé agora dadaun arguidu troka ona xavi odamatan ne'ebé arguidu halo aat.

Iha alegasaun finál, Ministériu Publikú husu tribunál atu kondena arguidu ho suspensaun ba pena.

Defeza husu tribunál atu fó pena ne'ebé justu ba arguidu tanba arguidu konfesa faktus sira iha akuzasaun laran.

Tribunál konklui kazu ne'e no kondena arguidu ho pena prizaun fulan 3 suspende tinan 1.

7. Kazu krime infantisídiu - Nú. Prosesu: 219/pen/2013/TDS

Kompozisaun Tribunál	: Koletivu
Juis	: Dr. Costancio Barros Basmerly (representa juis koletivu)
Ministériu Públiku	: Dr. Antonio da Silva Tavares
Defeza	: Dr. Manuel Amaral (estajiariu)
Konkluzau	: Kondena pena prizaun tinan 3 suspende ba tinan 5

Iha 18 Marsu 2013, Tribunál Distritál Suai liuhosi julgamentu movel iha Distritu Maliana, prezide leitura akordaun no kondena arguida VS ho pena prizaun tinan 3, suspende ba tinan 5 tanba provadu komete krime infantisídiu, iha 30 Setembru 2013, iha Distritu Bobonaro.

Ministériu Públiku akuza katak iha 30 Setembru 2013 maizumenus tuku 06:00 lorokraik arguida partus bebe fetu ida. Depois partus tiha, arguida falun bebe ho nia roupa no hatama iha plastik laran ba soe subar iha uma kotuk. Kazu ne'e akontese tanba arguida moe no tanba mane ne'ebé fó oan lakohi responsabiliza ba bebe ne'e.

Ministériu Públiku akuza arguidu kontra artigu 142 Kódigu Penál kona-ba infantisídiu ne'ebé ho nia moldura penál hosi tinan 3 to'o 10 prizaun.

Iha tribunál arguida deklara katak nia soe nia oan ka halo hanesan fótanba mane ne'ebé fó oan ba nia lakohi responsabiliza ba bebe ne'e.

Tuir depoimentu hosi testemuña MA katak nia lahatene arguida partus, maibe testemuña harearguida soe plastik ida iha uma kotuk tanba ne'e testemuña la'o ba hare no hakfódak rona

bebe tanis iha plastik laran. Iha loron ne'e kedas testemuña lori bebe ba Ospital Referral Maliana no konsege salva bebe nia moris.

Iha alegasaun final, Ministériu Publiku husu ba tribunál atu kondena arguida ho pena prizaun tinan 4 no suspende ba tinan 5. Alegasaun ne'e bazeia ba produsan provas ne'ebé hatudu katak arguida komete duni krime ne'e.

Defeza husu ba tribunál atu fó pena ne'ebé justu ba arguida tanba arguida konfesa totalmente ba faktus no provas ne'ebé mak nia halo.

Bazeia ba faktu sira ne'e, tribunál konklui kazu ne'e no kondena arguida ho pena prizaun tinan 3 suspende ba tinan 5.

8. Kazu krime ofensa ba integridade física simples ho natureza violência doméstica - Nú. Prosesu: 47/pen/2014/TDS

Kompozisaun Tribunál	: Singulár
Juis	: Dr. Costâncio Barros Basmerly
Ministériu Públiku	: Dr. Antonio da Silva Tavares
Defeza	: Dr. Manuel Amaral (estajiu)
Konkluzau	: Kondena pena prizaun fulan 6 suspende tinan 1

Iha 20 Marsu 2014, Tribunál Distritál Suai hala'o julgamentu ba kazu ofensa ba integridade física simples ne'ebé involve arguidu CdCdJ hasoru nia feen. Kazu ne'e akontese iha 11 Novembru 2013, iha Distritu Suai.

Ministériu Públiku katak iha 11 Novembru 2013, maizumenus tuku 05:00 lorokraik, arguidu lori ai-padasuk ida baku dala ida iha lezada nia ulun ne'ebé rezulta kanek no tenke suku pontu rua. Kazu ne'e akontese tanba arguidu lakontenti ho lezada ne'ebé haruka sira nia oan ba kuru be ho jeregen bar-barak.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjugadu ho artigu 35 alinea (b) Lei Kontra Violência Doméstica.

Iha alegasaun final, Ministériu Publiku husu ba tribunál atu kondena arguidu ho pena prizaun tinan 1 suspende ba tinan 2. Alegasaun ne'e bazeia ba produsan de provas hatudu katak arguidu komete duni krime ne'ebé Ministériu Publiku akuza ba arguidu.

Defeza husu tribunál atu fó pena suspensaun ne'ebé kmaan ba arguidu tanba arguidu ho lezada diak malu ona, sira hela hamutuk nu'udar feen no laen hanesan bai-bain no nunka mósu problema to'o agora.

Tribunál konklui kazu ne'e no kondena arguidu ho pena prizaun fulan 6 suspende ba tinan 1.

9. Kazu krime abuzu seksuál ba menór - Nú. Prosesu: 105/pen/2013/TDS

Kompozisaun Tribunál	: Koletivu
Juis	: Dr. Pedro R. de Figueiredo (representante juis koletivu)
Ministériu Públiku	: Dra. Benvinda da Costa Rosario
Defeza	: Dr. João H. de Carvalho
Konkluzau	: Absolve

Iha 20 Marsu 2014, Tribunál Distritál Suai julga arguidu JdS ne'ebé diskunfia komete abuzu seksuál hasoru menór ho inisial (FM), iha 19 Jullu 2010, iha Distritu Suai.

Ministériu Públiku akuza katak iha 19 Jullu 2010, maizumenus iha tuku 04:00 lorokraik, arguidu tuir lezada ba hare karau no ho ameasa lezada halo relasaun seksuál ho lezada ne'ebé ho idade tinan 13 fulan 8. Arguidu halo relasaun seksuál hasoru lezada dala 11 no ikus mai lezada isin rua.

Ministériu Públiku akuza arguidu kontra artigu 177 Kódigu Penál kona-ba abuzu seksuál ba menór ne'ebé ho nia moldura finálpenál hosi tinan 5 to'o tinan 15 prizaun.

Iha tribunál arguidu nega faktus sira husi akuzasaun Ministériu Públiku. Arguidu mós nega oan ne'ebé vítima kous la'os nia oan maibe OA nia oan tanba OA mak halo relasaun ho lezada.

Iha parte seluk, lezada deklarata katak tuir loloos aman hosi nia oan mak OA maibe tanba OA la responsabiliza maka nia duun fali ba arguidu JDS.

Testemuña BDJ ho PM depoimentu katak depoisde lezada isin rua mak sira hatene arguidu no lezada iha relasaun.

Iha alegasaun finál, Ministériu Publikú husu ba tribunál atu kondena arguidu ho pena prizaun tinan 8. Defeza husu ba tribunál atu fó pena ne'ebé justu ba arguidu tanba arguidu la halo relasaun seksuál ho lezada.

Iha 25 Marsu 2014, Tribunál konklui prosesu ne'e no absolve arguidu tanba tribunál la hetan prova suficiente hodi kondena arguidu mak fó isin rua ba lezada.

10. Kazu krime ofensa ba integridade fízika simples ho natureza violénsia doméstika - Nú. Prosesu: 20/pen/2014/TDS

Kompozisaun Tribunál	: Singulár
Juis	: Dr. Pedro R. de Figueiredo
Ministériu Públiku	: Dr. Antonio da Silva Tavares
Defeza	: Dr. Manuel Amaral (estajiariu)
Konkluzau	: Kondena pena prizaun fulan 6 suspende tinan 1

Iha 24 Marsu 2014, Tribunál Distritál Suai julga arguidu JC ne'ebé involve krime ofensa ba integridade fízika simples hasoru nia feen, iha 16 Jullu 2013, iha Distritu Bobonaro.

Ministériu Públiku akuza katak iha 16 Jullu 2013, arguidu basa dala ida iha lezada nia hasan sorin-los, buti lezada nia kakorok no riba ba rai. Aktu ne'e rezulta lezada hetan bubu iha hasan no kotuk laran.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 alinea (b) Lei Kontra Violénsia Doméstika.

Iha tribunál, arguidu konfesa totalmente ba faktus sira ne'ebé mak nia halo no deklarara arrepende nia sala.

Iha alegasaun finál, Ministériu Publikú husu ba tribunál atu kondena arguidu ho pena prizaun tinan 1 suspende ba tinan 2. Alegasaun ne'e bazeia ba produsan provas ne'ebé hatudu katak arguidu komete duni krime ne'ebé akuza ba nia.

Defeza husu tribunál atu fó pena suspensaun ne'ebé kmaan ba arguidu tanba arguidu ho lezada diak malu ona, sira hela hamutuk nu'udar feen ho laen no laiha problema to'o agora.

Bazeia ba faktu sira ne'ebé produz durante julgamentu, tribunál konklui no kondena arguidu ho pena prizaun fulan 6 suspende ba tinan 1.

11. Kazu krime ofensa ba integridade fízika simples - Nú. Prosesu: 129/pen/2014/TDS

Kompozisaun Tribunál	: Singulár
Juis	: Dra. Florensia Freitas
Ministériu Públiku	: Dra. Benvinda da Costa Rosario
Defeza	: Dr. Manuel Amaral (estajariu)
Konkluzau	: Sei kontinua prosesu

Iha 26 Marsu 2014, Tribunál Distritál Suai liuhosi julgamentu movel iha Distritu Ainaro, hala'o prosesu julgamentu ba arguidu AdS no AdSC tanba diskunfia komete krime ofensa ba integridade fízika simples hasoru JAM no AM, iha 19 Dezembru 2012, iha Distritu Ainaro.

Ministériu Públiku akuza katak iha 19 Dezembru 2012, maizumenus iha tuku 09:30 dader, arguidu AdS no AdSC diskuti malu ho lezadu JAM kona-ba lezadu sira nia kuda ne'ebé tebe mate arguidu sira nia kuda maibe lezadu sira lakohi selu.

Depois mósAM hanesan lezadu JAM nia oan mai no kontinua diskuti malu ho arguidu sira. Tanba ne'e, arguidu sira nervozu no arguidu AdS foti fatuk ida tuda iha lezadu AM iha hasan los. Aktu ne'e rezulta lezadu hetan kanek no ran iha nia hasan no tenke suku pontu haat. Aleinde ne'e arguida AdSC foti ai-dona ida baku dala rua iha lezadu AM nia kelen no hodi

fatuk tuku dala ida iha lezadu AM nia ulun ne'ebé rezulta kanek no suku pontu rua. Enkuantu lezadu JAM ne'ebé akompaña no hamutuk AM la hetan baku ka agresaun fízika ruma hosi arguidu sira.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples ne'ebé ho nia moldura penál to'o tinan 3 ka multa.

Iha alegasaun finál, Ministériu Públiku husu ba tribunál atu kondena arguidu ho pena prizaun tinan 2 suspende ba tinan 2 tanba arguidu komete duni krime ne'e.

Defeza husu ba tribunál atu fó pena prizaun fulan 6 suspende ba tinan 1 tanba arguidu konfesa totalmente ba faktus ne'ebé nia halo no arrepende ninia hahalok.

Depois rona tiha alegasaun hosi parte sira, tribunál marka fali agenda julgamentu ba leitura sentensa iha 10 Abril 2014, tuku 14:00 lorokraik.

12. Kazu krime ofensa ba integridade fízika simples ho natureza violénsia doméstika - Nú. Prosesu: 58/pen/2014/TDS

Kompozisaun Tribunál	: Singulár
Juis	: Dra. Florensia Freitas
Ministériu Públiku	: Dra. Benvinda da Costa Rosario
Defeza	: Dr. Manuel Amaral (estajiaru)
Konkluzau	: Kondena ho pena prizaun fulan 6 suspende tinan 1, selu kustus judisial US\$ 20,00

Iha 26 Marsu 2014, Tribunál Distritál Suai liuhosi julgamentu movel iha Distritu Ainaro hala'o prosesu julgamentu ba kazu ofensa ba integridade fízika simples ne'ebé involve arguidu EdAT hasoru nia oan. Kazu ne'e akontese iha 02 Setembru 2012, iha Distritu Ainaro.

Ministériu Públiku akuza katak iha 02 Setembru 2012, arguidu basa lezadu nia hasan karuk no rezulta lezadu hetan kanek no bubu iha hasan. Kazu ne'e akontese tanba lezadu lakohi ba eskola.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 alinea (b) Lei Kontra Violénsia Doméstika.

Iha audensia julgamentu arguidu konfesa totalmente ba faktus ne'ebé mak nia halo no deklarata katak nia arrepende ninia hahalok.

Iha alegasaun finál, Ministériu Publikú husu ba tribunál atu kondena arguidu ho pena prizaun tinan 3 suspende ba tinan 3. Alegasaun ne'e bazeia ba produsan provas hatudu katak arguidu komete duni krime ne'ebé Ministériu Publikú akuza ba arguidu.

Defeza husu tribunál atu kondena arguidu ho pena multa tanba hare ba sirkunstansia atenuantes sira hanesan arguidu ho lezadu diak malu, sira hela hamutuk nu'udar aman ho oan hanesan bai-bain no nunka mósu problema to'o agora.

Tribunál konklui prosesu ne'e no kondena arguidu ho pena prizaun fulan 6 suspende ba tinan 1 no selu kustus judisiál US\$ 20,00.

13. Krime abuza konfiansa agravadu - Nú. Prosesu: 02/pen/2011/TDS

Kompozisaun Tribunál	: Koletivu
Juis	: Dr. Costãncio Barros Basmerly no Dr. Argentino Luisa Nunes, Dr. Alvaro Maria Freitas
Ministériu Públiku	: Dra. Benvinda da C. Rosario, Dr. Antonio Tavares
Defeza	: Dr. Manuel Amaral, Dr. João H. De Carvalho
Konkluzau	: Sei kontinua prosesu

Iha 18 Marsu 2014, Tribunál Distritál Suai hala'o julgamentu movel iha Distritu Ainaro hodi julga kazu abuza konfiansa agravadu ne'ebé involve arguidu AdS hasoru Estadu, iha 20 Outubru 2009 iha Distritu Ainaro.

Ministériu Públiku akuza katak iha 20 Outubru 2009, arguidu ne'ebé nu'udar xefe suco uza tiha osan US\$ 6000,00 ne'ebé partensia ba Ministériu Agrikultura no Floresta (FDK) ba nia interese pesoál. Osan refere tuir loloos atu sosa karau no entrega ba iha comunidade sira Suco Aituto partikularmente ba iha Aldeia sira hanesan Airakalau, Betulala, Lihintutu no Aihou.

Ministériu Públiku akuza arguidu kontra artigu 257 Kódigu Penál kona-ba abuza konfiansa ne'ebé nia moldura finálpenál entre tinan 2 to'o tinan 8 prizaun, konjugadu ho artigu 303 kona-ba falsifikasaun ba dokumentu.

Iha tribunál arguidu rekoñese ninia hahalok no promete atu fó fila fali osan ne'ebé nia uza ona iha tinan 1 fulan 6 nia laran. Ministériu Agrikultura konkorda ho deklarasaun hosi arguidu katak sei kompleta osan ne'ebé nia uza durante tinan 1 fulan 6 nia laran.

Iha alegasaun finál, Ministériu Públiku husu ba tribunál atu kondena arguidu ho pena suspensaun durante tinan 5 no selu fali osan Estadu nian ne'ebé arguidu halakon ona, maibe wainhira tribunál iha hanoin seluk husu atu fó justisa ba arguidu.

Defeza husu ba tribunál atu fó pena suspensaun ne'ebé kmaan ba arguidu tanba arguidu konfesa totalmente ba faktus ne'ebé mak akuza ba arguidu.

Depois rona tiha alegasaun hosi parte sira, tribunál marka fali agenda ba leitura sentensa iha 09 Abril 2014, tuku 11:00 dader.

14. Kazu krime maus tratus ba kónjuje - Nú. Prosesu: 53/pen/2013/TDS

Kompozisaun Tribunál : Koletivu
Juis : Dra. Florensia Freitas, Dr. Argentino Luisa Nunes,
Dr. Alvaro Maria Freitas
Ministériu Públiku : Dra. Benvinda da C. Rosario, Dr. Antonio
Tavares
Defeza : Dr. Manuel Amaral, Dr. João H. de Carvalho
Konkluzau : Sei kontinua prosesu

Iha 26 Marsu 2014, Tribunál Distritál Suai liuhosi julgamentu movel iha Distritu Ainaro hala'o prosesu julgamentu ba kazu maus tratus ba kónjuje ho ameasa ne'ebé involve arguidu DMdA hasoru SCX nu'udar arguidu nia feen no VXM nu'dar arguidu nia oan. Kazu ne'e akontese iha 29 Marsu 2012, iha Distritu Ainaro.

Ministériu Públiku akuza katak iha 29 Marsu 2012, tanba lanu, arguidu trata aat no baku nia feen no nia oan mane. Ministériu Públiku akuza arguidu sira kontra artigu 154 Kódigu Penál kona-ba maus tratus ba kónjuje.

Iha tribunál, lezada SCX deklara katak arguidu tuku dala rua iha nia isin no kontinua tuku dala rua iha hasan los, buti kakorok no rasta lezada. Arguidu foin mak husik lezada wanhira lezada foti *gas air-mata* rega iha arguidu nia oin. Aleinde ne'e, VXM mós deklara katak arguidu baku dala ida iha nia kabas.

Durante julgamentu, arguidu konfesa totalmente ba faktus ne'ebé mak Ministériu Públiku akuza hasoru nia. Iha parte seluk lezada deklara katak arguidu baku no ameasa duni nia maibe ne'e akontese dala ida deit no agora sira diak malu ona no nunca mósu tan problema.

Iha alegasaun finál, Ministériu Públiku husu ba tribunál atu kondena arguidu ho pena prizaun tinan 2 suspende ba tinan 3 tanba arguidu komete duni krime ne'e. Defeza husu ba tribunál atu fó justisa ne'ebé justu ba arguidu tanba arguidu konfesa totalmente ba faktus sira ne'ebé mak Ministériu Públiku akuza hasoru nia.

Depois rona tiha alegasaun hosi parte sira, tribunál marka agenda ba leitura sentensa iha 10 Abril 2014, iha tuku 10:00 dader.

15. Kazu krime furtu agravadu - Nú. Prosesu: 117 /pen/2013/TDS.

Kompozisaun Tribunál : Koletivu
Juis : Dra. Florensia Freitas, Dr. Alvaro Maria Freitas,
Dr. Argentino Luisa Nunes
Ministériu Públiku : Dr. Antonio da Silva Tavares
Defeza : Dr. Manuel Amaral
Konkluzau : Sei kontinua prosesu

Iha 28 Marsu 2014 Tribunál Distritál Suai liuhosi julgamentu movel iha Distritu Ainaro hala'o prosesu julgamentu ba kazu furtu agravadu ne'ebé involve arguidu NB, JdS, no SdA hasoru ONG Centru Komunidade no ONG Tolhae, iha 30 Maiu 2011, iha Distritu Ainaro.

Ministériu Públiku akuza katak iha 30 Maiu 2011, maizumenus tuku 00:00 kalan boot, arguidu sira tama ba iha edifisiu Centru Komunidade hodi foti laptop 8 no fiu rua no iha ONG Tolhae foti laptop Accer 1, kamera Samsung 1 no biskleta federal 1. Sasan ne'ebé mak arguidu sira foti agora prende iha Eskuarda Polísia Ainaro.

Ministériu Públiku akuza arguidu sira kontra artigu 252 Kódigu Penál kona-ba furtu agravadu ho nia moldura finalpenál tinan 2 to'o tinan 8 prizaun.

Arguidu sira konfesa totalmente ba faktus ne'ebé mak sira halo no deklarata katak sasan hirak ne'e intrega hotu ba iha Eskuadra Polísia Ainaro.

Iha alegasaun final, Ministériu Públiku husu ba tribunál kondena arguidu sira tanba arguidu sira komete duni krime ne'e. Iha parte seluk defeza husu ba tribunál atu fó pena ne'ebé justu ba arguidu sira tanba arguidu sira konfesa loloos tuir faktus ne'ebé mak sira halo.

Depois rona tiha alegasaun final hosi parte sira, tribunál anunsia fali julgamentu ba leitura sentesa hala'o iha 10 Abril 2014, iha tuku 14:00 lorokraik.

16. Kazu krime burla agravadu - Nú. Prosesu: 247/pen/2013/TDS

Kompozisaun Tribunál	: Koletivu
Juis	: Dr. Alvaro Maria Freitas, Dra. Florensia Freitas, Dr. Argentino Luisa Nunes.
Ministériu Públiku	: Dr. Antonio da Silva Tavares.
Defeza	: Dr. João H de Carvalho
Konkluzau	: Sei kontinua prosesu

Iha 27 Marsu 2014, Tribunál Distritál Suai liuhosi julgamentu movel iha Distritu Ainaro julga kazu burla agravadu ne'ebé involve arguidu FM hasoru MMM hanesan lezadu. Kazu ne'e akontese iha 15 Juñu 2011, iha Distritu Ainaro.

Ministériu Públiku akuza katak iha 15 Juñu 2011, arguidu halo falsifikasaun dokumentus hosi veteranus martires Mateus Mau Malu ba osan hamutuk US\$ 6500,00. Ministériu Públiku akuza arguidu kontra artigu 267 Kódigu Penál kona-ba burla agravadu ne'ebé nia pena abstratu entre tinan 3 to'o tinan 10 prizaun, konjugadu ho artigu 303 kona-ba falsifikasaun ba dokumentu.

Iha tribunál, arguidu konfesa totalmente ba faktus sira ne'ebé mak Ministériu Públiku akuza hasoru nia no prontu selu fila fali osan hirak ne'ebé nia uza iha periodu tinan 1 fulan 6 nia laran.

Iha alegasaun finál, Ministériu Públiku husu ba tribunál atu kondena arguidu ho pena suspensaun ou selu multa. Iha parte seluk, defeza husu ba tribunál atu aplika pena suspensaun ba arguidu tanba hare ba sirkunstansia atenuantes balun hanesan arguidu konfesa totalmente ba faktus ne'ebé mak nia halo.

Depois rona tiha alegasaun hosi parte sira, tribunál marka fali agenda ba leitura sentensa iha 11 Abril, maizumenus tuku 14:30 lorokraik.

17. Kazu krime ofensa ba integridade física grave - Nú. Prosesu: 51/pen/2014/TDS

Kompozisaun Tribunál	: Koletivu
Juis	: Dr. Costãncio Barros Basmerly, Dr. Argentino Luisa Nunes, no Dr. Alvaro Maria Freitas
Ministériu Públiku	: Dr. Antonio da Silva Tavares
Defeza	: Dr. João H de Carvalho
Konkluzau	: Kondena ho pena prizaun tinan 3 suspende tinan 3

Iha 27 Marsu 2014, Tribunál Distritál Suai liuhosi julgamentu movel iha Distritu Ainaro, julga kazu ofensa ba integridade física grave ne'ebé involve arguidu Armindo da Costa de Araujo hasoru lezadu Estefanio Sarmiento Lopes. Arguidu ho lezadu iha relasaun família hanesan maun no alin. Kazu ne'e akontese iha 28 Janeiru 2013, iha Distritu Ainaro.

Ministériu Públiku akuza katak iha 28 Janeiru 2013, arguidu lori katana ida taa iha lezadu nia ain karuk no rezulta lezadu hetan kanek no ran sai barak. Kazu ne'e akontese tanba lezadu lori sanan metan liuhosi sira nia uma lulik, nune'e arguidu nervozu hodi taa lezadu. Vítima baixa iha Ospital Nacional Guido Valadares Dili durante fulan neen.

Tanba aktu ne'e, Ministériu Públiku akuza arguidu kontra artigu 146 Kódigu Penál kona-ba ofensa ba integridade física grave.

Iha tribunál, arguidu konfesa totalmente ba faktus sira ne'ebé mak Ministériu Públiku akuza hasoru nia. Lezadu deklarata katak nia ain agora iha kondisaun normál hodi nune'é nia fó perdaun ba arguidu. Aleinde ne'e lezadu deklarata katak nia fó perdaun tanba sira iha relasaun família.

Bazeia matéria produsaun ba prova hirak ne'e, tribunál altera artigu 146 ba artigu 145 kona-ba ofensa ba integridade física simples.

Iha alegasaun finál, Ministériu Públiku husu ba tribunál atu kondena arguidu ho pena suspensaun tanba arguidu komete duni krime ne'e. Entretantu defeza husu ba tribunál atu fó pena ne'ebé justu ba arguidu tanba arguidu konfesa totalmente faktus no arrende ninia hahalok.

Depois avalia faktu sira ne'ebé produz durante julgamentu tribunál konklui no kondena arguidu ho pena prizaun tinan 3 suspende ba tinan 3.

18. Kazu krime maus tratus ba kónjuje no interupsaun ba grávidez- Nú. Prosesu: 181/pen/2013/TDS

Kompozisaun Tribunál : Koletivu
Juis : Dra. Florensia Freitas, Dr. Alvaro Maria Freitas,
Dr. Argentino Luisa Nunes.
Ministériu Públiku : Dra. Benvinda da CRosario.
Defeza : Dr. João H. de Carvalho
Konkluzauun : Sei kontinua prosesu

Iha 27 Marsu 2014, Tribunál Distritál Suai liuhosi julgamentu movél iha Distritu Ainaro, hodi julga arguidu EFA ne'ebé prátika krime maus tratus ba kónjuje ne'ebé rezulta lezada hetan abortus, iha Distritu Ainaro.

Ministériu Públiku akuza katak iha 25 Janeiru 2012, arguidu, basa dala rua iha lezada nia hasan loos no karuk. Aleinde ne'e, arguidu mós tuku dala barak iha lezada nia hirus matan no kotuk, dudu monu ba rai no sama dala rua iha lezada nia kabun.

Tuir mai iha 26 Janeiru 2012, arguidu kontinua basa dala rua iha lezada nia hasan loos no karuk. Kazu ne'e, akontese tanba diskute-malu entre arguidu ho lezada.

Iha 19 Marsu 2012, arguidu basa dala rua iha hasan los no karuk. Arguidu kaer lezada nia fuk rasta ba estrada no kontinua tuku no tebe dala barak iha lezada nia isin lolon. Aktu ne'e rezulta lezada sofre trauma, moras makas iha nia isin lolon, ran fakar makas sai hosi orgaun seksuál no kauza lezada hetan abortus no baixa iha ospital durante loron 2 kalan 1.

Kazu ne'e akontese tanba lezada –diskute-malu ho arguidu nia alin (MF), nune'e arguidu defende nia alin hodi tafui kaben ba lezada no kontinua halo agresaun ba lezada.

Bazeia ba faktu sira ne'e hotu, Ministériu Públiku akuza arguidu kontra artigu 154 kona-ba krime maus tratus ba kónjuje ho nia moldura finalpenál tinan 2 too tina 8 no krime interupsaun ba gravidés ho nia moldura finalpenál tinan 2 to'o tinan 8.

Iha julgamentu arguidu nega faktus balun katak la tuku tebe lezada. Faktus ne'ebé arguidu rekoñese mak sempre diskute-malu ho lezada no nia basa deit. Tanba ne'e, tribunál halo konfirmasaun ba lezada no lezada konfirma faktus sira iha akuzasaun ne'e loos hotu no agora dadauk sira hela separadu.

Testamuña VL ne'ebé nu'udar arguidu nia inan deklara ba tribunál katak nia hatene no hare deit mak akontesimentu iha 25 Janeiru 2012 ne'ebé arguidu ho lezada diskute-malu no arguidu baku lezada. Maibé testemuña la hare akontesimentu iha loron sira seluk tanba sira hela ketak ona.

Iha alegasaun finál, Ministériu Públiku husu ba tribunál atu kondena arguidu ho pena prizaun tinan 4 tanbá provadu prátika krime maus tratus ba kónjuje ne'ebé kauza abortu. Iha parte seluk defeza iha nia konkluzau husu ba tribunál atu fó pena ne'ebé justu no adekuada ba arguidu.

Depois rona tiha alegasaun hosi parte sira, tribunál marka agenda ba julgamentu leitura akordaun iha 11 Abril 2014, iha tuku 14:00 lokraik iha TDS.

19. Kazu krime ofensa ba integridade fízika simples no danu simples - Nú. Prosesu: 50/ pen/2009/TDS

Kompozisaun Tribunál : Koletivu
Juis : Dra. Florencia Freitas, Dr. Costáncio Barros
Basmery no Dr. Argentino Luisa Nunes
Ministériu Públiku : Dr. Antonio da Silva Tavares
Defeza : Dr. João Henrique de Carvalho
Konkluzau : Adia tanba arguidu la marka prezensa

Iha 27 Marsu 2014, Tribunál Distritál Suai liuhosi julgamentu movel iha Distritu Ainaro adia prosesu julgamentu ba kazu ofensa ba integridade fízika simples no danu simples tanba arguidu la marka prezensa mesmu tribunál notifika ona.

Kazu ne'e involve arguidu AM ne'ebé prátika krime refere hasoru lezadu AS iha Distritu Ainaro.

Tanba ne'e liuhosi tribunál movel ne'e anunsia katak julgamentu foun ne'ebé sei hala'o iha 25 Juñu 2014, tuku 09:30 dader.

20. Kazu krime ofensa integridade fízika grave - Nú. Prosesu: 40/pen/2010/TDS

Kompozisaun Tribunál : Koletivu
Juis : Dra. Florencia Freitas Dr. Dr. Costáncio Barros
Basmery no Dr. Argentino Luisa Nunes
Ministériu Públiku : Dr. Antonio da Silva Tavares
Defeza : Dr. João Henrique de Carvalho
Konkluzau : Adia tanba arguidu sira la marka prezensa

Iha 27 Marsu 2014, Tribunál Distritál Suai liuhosi julgamentu movel iha Distritu Ainaro adia prosesu julgamentu ba kazu ofensa ba integridade fízika grave ne'ebé involve arguidu PMA, AM, no DP hasoru vítima sira hanesan: JPC, DAC, DJS, no LSdC. Kazu ne'e akontese iha Distritu Ainaro.

Hanesan mós iha kazu leten, tribunál halo adiamentu ba kazu ne'e tanba arguidu sira la marka prezensa mesmu tribunál notifika ona.

Julgamentu kazu ne'e sei hala'o fali iha 25 Juñu 2014, tuku 11:30 dader.

21. Kazu krime violasaun seksuál agravadu - Nú. Prosesu: 166/pen/2012/TDS

Kompozisaun Tribunál : Koletivu
Juis : Dr. Costáncio Barros Basmery, Dr. Argentino Luisa
Nunes, no Dr. Alvaro Maria Freitas
Ministériu Públiku : Dr. Antonio da Silva Tavares
Defeza : Dr. João Henrique de Carvalho
Konkluzau : Adia tanba arguidu la marka prezensa

Iha 27 Marsu 2014, Tribunál Distritál Suai liuhosi julgamentu movel iha Distritu Ainaro adia prosesu julgamentu ba kazu violasaun seksuál agravadu ne'ebé involve arguidu AQ hasoru lezada JB ne'ebé akontese iha Distritu Ainaro.

Tribunál adia prosesu julgamentu tanba arguidu la marka prezensa iha Tribunál Distritál Suai mesmu hetan ona karta notifikasaun.

Tanba ne'e, tribunál decide atu kontinua fali julgamentu ba kazu ne'e iha 25 Maiu 2014 , tuku 10:00 dader.

22. Kazu krime danu simples - Nú. Prosesu: 10/pen /2014/TDS

Kompozisaun Tribunál : Singulár
Juis : Dr. Costáncio Barros Basmery
Ministériu Públiku : Dr. Antonio da Silva Tavares
Defeza : Dr. João Henrique de Carvalho
Konkluzau : Adia tanba arguidu la marka prezensa

Iha 27 Marsu 2014, Tribunál Distritál Suai liuhosi julgamentu movel iha Distritu Ainaro adia prosesu julgamentu ba kazu danu simples tanba arguidu la marka ninia prezensa mesmu tribunál notifika ona.

Arguidu ho inisiál MdA no TdC alega involve iha krime danu simples hasoru lezadu DdR, ne'ebé akontese iha Distritu Ainaro.

Tanba ne'e, tribunál marka fali julgamentu foun ba kazu ne'e iha 29 Abril 2014, tuku 11:00 dader.

23. Kazu krime abuzu seksuál ba menór - Nú. Prosesu: 13 /pen/2014/TDS

Kompozisaun Tribunál : Koletivu
Juis : Dr. Costáncio Barros Basmery, Dr. Argentino Luisa
Nunes, no Dr. Alvaro Maria Freitas

Ministériu Públiku : Dr. Antonio da Silva Tavares
Defeza : Dr. João Henrique de Carvalho
Konkluzau : Adia tanba arguidu la marka prezensa

Iha 28 Marsu 2014, Tribunál Distritál Suai liuhosi julgamentu movel iha Distritu Ainaro adia prosesu julgamentu ba kazu abuzu seksuál ba menór tanba arguidu la marka ninia prezensa mesmu tribunál notifika ona.

Kazu ne'e involve arguidu AL ne'ebé diskunfia prátika krime abuzu seksuál hasoru vítima LB ho idade menór, iha Distritu Ainaro.

Tanba ne'e, tribunál adia fali julgamentu ba kazu ne'e no marka fali julgamentu foun ba kazu ne'e iha 30 Abril 2014, tuku 14:00 lorokraik.

24. Kazu sivil inventário ba menóres – Nú. Prosesu: 88/civil/2013/TDS

Kompozisaun Tribunál : Singulár
Juis : Dr. Pedro Rapozo de Figueiredo
Ministériu Públiku : Dr. Felismino Garcia Cardoso
Defeza : Dr. Manuel Amaral (estajiadu)
Konkluzau : Remata/Finál

Iha 28 Marsu 2014, Tribunál Distritál Suai liuhosi julgamentu movél iha Distritu Ainaro halo konsiliausaun ba kazu inventário ba menóres. Autora ba kazu ne'e ho inisiál AS kontra GS hanesan reu.

Iha prosesu konsiliausaun ne'e, autóra no reu konkorda atu fahe riku soin ba oan nain ha'at.

Tanba parte rua konkorda malu maka kazu ne'e remata nia prosesu.

Atu hetan informasaun kle'an favor kontaktu direktamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org
Telefóne: 3323883/77295795
Webiste: www.jsmp.tl
Facebook www.facebook.com/timorleste.jsmp
Twitter: @JSMPTl